

# PASQUA 2015

De tut'i bei pagin di Vangeli  
Che cunten del Signor risort e 'ndà 'n Cieli  
Che me par pussè fresca, d'attualità  
L'è quela de quei du amis che tornaven a cà,  
Smorfia e delus per 'na bela storia  
Finida in sul Calvari senza gloria.

Lu 'l caminava 'me 'n pelegrin insemi a lor  
Ma 'l saveven no che l'era 'l Signor.  
Intant el ghe spiegava la Scritura  
Ma lor g'aveven la testa propi dura  
Capiven nient fin quand, quasi rivàa  
(El So l'era ormai drée a tramontà)  
Gh'è gnu su del coeur 'na bela preghiera :  
"Resta con num, Signor, l'è giamò sera!"  
Lu 'l s'è fermà e, 'pena setà, l'ha di 'n orazion  
Poeu l'ha tirà su 'l pan e l'ha fa a bocon.  
L'è sta lì c'han dervì i oeucc e l'han riconossu :  
L'era propi Lu, 'l Signor, el bon Gesù !  
Perfin quand l'è spari' sutaven a vedel  
Cont i oeucc de la fed : viv, present e bell !

L'è minga istess anca per num, o cara gent,  
Che basta on po de fed per vess cuntent  
Sicur che in tuti i noster magagn, i noster guai  
Lu l'è semper chi, 'l me 'bandona mai ?

La Pasqua, col coeur v'el disi, l'è propi questa  
E l'è la pussè bela d'ogni altra festa.  
Come dal'inverno fioriss la primavera  
Da la Sua Mort gh'è vegnu la vita : quela vera!

Buona Pasqua con tut'el coeur, mia cara gent  
Stè su aleggher e vegh paura de nient  
L'è viv, l'è chi el bon Gesù  
E stemm sigur : el me 'bandonerà pu !



**Un saluto e tanti Auguri : Buona Pasqua !**

*Don Arnaldo*